

CENTRALNA BANKA  
BOSNE I HERCEGOVINE



ЦЕНТРАЛНА БАНКА  
БОСНЕ И ХЕРЦЕГОВИНЕ

# INFO CBBiH





## U ovom broju:

CBBiH U SEPTEMBRU ORGANIZUJE MEĐUNARODNU KONFERENCIJU POD NAZIVOM „20 GODINA STABILNOSTI“



PLATNI BILANS BOSNE I HERCEGOVINE ZA 2016. GODINU



CBBiH PUSTILA U OPTICAJ DODATNE KOLIČINE NOVČANICA I KOVANOG NOVCA, ŠTAMPANIH I KOVANIH U 2017. GODINI



POČELA PRIMJENA NOVIH ODLUKA CBBiH IZ DOMENA RADA PLATNIH SISTEMA



KARTIČNO POSLOVANJE U BiH



PREDSTAVNICI AMERIČKIH FEDERALNIH REZERVI POSJETILI CBBiH



POČINJE IZRADA PLANA INTEGRITETA CBBiH



POSJETE UČENIKA I STUDENATA CENTRALNOJ BANCJI BOSNE I HERCEGOVINE



Izdavač: Centralna banka Bosne i Hercegovine;  
Adresa: Maršala Tita 25, 71000 Sarajevo

Priprema: Služba za odnose sa javnošću

Prevod tekstova na engleski jezik: Služba za odnose sa javnošću

Lektura (jezici bh. naroda i engleski jezik): Služba za publikacije i biblioteku i Služba za protokol i prevođenje

Web stranica: <http://www.cbbh.ba>  
E-mail: [pr@cbbh.ba](mailto:pr@cbbh.ba)  
kontakt telefon: (033) 278 123

## CBBiH U SEPTEMBRU ORGANIZUJE MEĐUNARODNU KONFERENCIJU POD NAZIVOM „20 GODINA STABILNOSTI“



U okviru aktivnosti za obilježavanje 20. godišnjice Centralne banke Bosne i Hercegovine (CBBiH), definisano je da 22. 9. 2017. godine bude datum održavanja međunarodne konferencije koja će nositi naziv „20. godina stabilnosti“. Naziv konferencije je ujedno i slogan pod kojim će CBBiH, tokom godine, voditi sve aktivnosti vezane za obilježavanje ovog jubileja. S tim u vezi, upućeno je pismo poziva članovima Predsjedništva Bosne i Hercegovine te panelistima na konferenciji – visokim zvaničnicima Evropske centralne banke, Međunarodnog monetarnog fonda, Evropske komisije, Evropske banke za obnovu i razvoj te guvernerima centralnih/narodnih banaka regiona: Srbije, Makedonije, Albanije, Bugarske, Crne Gore, Hrvatske, Rumunije i Slovenije. Izvršni odbor za obilježavanje 20. godišnjice CBBiH definisao je i preliminarni program konferencije. Pokrenute su aktivnosti na pripremi izložbe novca u Zemaljskom muzeju Bosne i Hercegovine, uz prijedlog da izložba zvanično bude otvorena 11. 8. 2017. godine, na dan godišnjice CBBiH, a zatvorena 22. 9. 2017. godine, na dan održavanja međunarodne konferencije.

## PLATNI BILANS BOSNE I HERCEGOVINE ZA 2016. GODINU



Centralna banka Bosne i Hercegovine objavila je podatke o platnom bilansu za 2016. godinu. Prema tim podacima deficit tekućeg računa iznosio je 1,31 milijardu KM, što je za oko 266 miliona KM manje u odnosu na 2015. godinu.

U relativnom iskazu, deficit tekućeg računa iznosio je 4,4% BDP-a, a što je značajno smanjenje u odnosu na 5,5% BDP-a u 2015. godini.

Glavni uzročnik deficita tekućeg računa je značajan debalans u vanjskotrgovinskoj razmjeni robe. Deficit trgovine robom u

2016. godini iznosio je 7,20 milijardi KM i za oko 219 miliona KM je bio manji u odnosu na 2015. godinu, što je rezultat povećanja izvoza roba. Na bilansu usluga ostvaren je suficit od 2,15 milijardi KM, što je za oko 65 miliona KM više u odnosu na godinu ranije, a čemu je povećan prihod od turizma dao doprinos.

Suficit primarnog dohotka je blago povećan i iznosi 160 miliona KM, dok je sekundarni dohodak u suficitu od 3,58 milijardi KM i neznatno je smanjen u odnosu na 2015. godinu. Najznačajnija stavka sekundarnog dohotka su primljeni tekući transferi koji su u 2016. godini iznosili 3,58 milijardi KM. Od toga, personalni transferi ili novčane doznake iz inostranstva iznosili su 2,44 milijardi KM, a ostali tekući transferi, od čega najviše penzije iz inostranstva, iznosili su 1,14 milijardi KM.

Na kapitalnom računu saldo je iznosio 355 miliona KM, što je za 47 miliona KM manje u odnosu na prethodnu godinu.

Na finansijskom računu su zabilježeni neto prilivi od 783 miliona KM (1,02 milijarde KM u 2015. godini), koji ukazuju na dalji rast obaveza prema nerezidentima kojima se finansirao deficit tekućeg računa. U okviru finansijskog računa, strane direktne investicije (neto pasiva) u BiH u 2016. godini iznosile su 460,6 miliona KM i bilježe smanjenje u odnosu na 2015. godinu za 55,6 miliona KM.



## CBBiH PUSTILA U OPTICAJ DODATNE KOLIČINE NOVČANICA I KOVANOG NOVCA, ŠTAMPANIH I KOVANIH U 2017. GODINI



Centralna banka Bosne i Hercegovine (CBBiH) pustila je u opticaj novčanice konvertibilne marke u apoenima od 10, 50 i 100 KM i kovani novac u apoenima od 5, 10, 20 i 50 feninga i 1 KM, dodatno štampane i kovane u 2017. godini. Novčanice i kovani novac navedenih apoenina, izdanje 2017. godina, štampani su i kovani u skladu s redovnim aktivnostima CBBiH, koje imaju za cilj osigurati dovoljno novčanica i kovanog novca odgovarajuće apoeninske strukture za potrebe gotovinskog prometa u BiH. Novo izdanje novčanica zamijenice u opticaju novčanice prethodnih izdanja, koje će zbog dotrajalosti tokom

prethodnih godina, biti povučene iz optičaja. Novčanice prethodnih izdanja, čiji je kvalitet zadovoljavajući u skladu sa standardima CBBiH, kao i kovani novac prethodnih izdanja, i dalje će ostati u opticaju kao zakonsko sredstvo plaćanja.

Osnovna obilježja novčanica štampanih u 2017. godini ostaju ista kao i na novčanicama prethodnih izdanja, s tom razlikom što je na novom izdanju naznačena brojčana oznaka „2017“ kao godina štampanja navedenih apoenina i potpis guvernera CBBiH „Senad Softić“. Također, ostaju ista obilježja dodatnih količina novca kovanog u 2017. godini, s tim da se na naličju kovanog novca svih apoenina nalazi brojčana oznaka „2017“, kao godina kovanja navedenih apoenina.

Štampanje i kovanje novih količina novčanica i kovanog novca konvertibilne marke nema inflacijski efekt, jer nijedna KM neće biti puštena u opticaj bez poštivanja principa valutnog odbora, što znači da svaka izdana konvertibilna marka ima pokriće u stranoj valuti po fiksnom kursu.

Novčanice i kovani novac će u opticaj biti pušteni sukcesivno, odnosno prema potrebi, posredstvom glavnih jedinica i filijala CBBiH.

## POČELA PRIMJENA NOVIH ODLUKA CBBiH IZ DOMENA RADA PLATNIH SISTEMA



Od 1. 3. 2017. godine počela je primjena nove Odluke o utvrđivanju tarife naknada za usluge koje vrši Centralna banka Bosne i Hercegovine (CBBiH), te primjena nove Odluke o utvrđivanju operativnih pravila za žirokliring. Ovim odlukama, koje su motivirane modernizacijom platnih sistema prilagođenim direktivama Evropske unije, tj. uvođenju SEPA formata, u žirokliring sistemu (obavljanje platnih transakcija za banke do 10.000 KM), umjesto dosadašnjih tri, uvedena su četiri poravnanja, što omogućava pravnim i fizičkim licima češće procesuiranje njihovih platnih naloga u toku dana. Također, mijenjaju se tarife naknada za obavljanje platnih transakcija u žirokliring sistemu i to:

- za prvo poravnanje 0,20 KM po transakciji (umjesto dosadašnjih 0,10 KM),
- za drugo poravnanje 0,25 KM po transakciji (umjesto dosadašnjih 0,15 KM),
- za treće poravnanje 0,30 KM po transakciji (umjesto dosadašnjih 0,20 KM), te
- za četvrto poravnanje 0,35 KM po transakciji.

Također, umjesto dosadašnjih 0,30 KM, novom Odlukom o utvrđivanju tarife naknada za usluge koje vrši CBBiH, naknada za pristup Centralnom registru kredita (CRK) sada iznosi 1,00 KM.

Ovim odlukama postiže se efikasnije vrednovanje usluga platnih sistema (žirokliring, registri računa, Registar kredita, RTGS, SWIFT, EMTN...) vezano za poboljšanje i povećanje kvaliteta i brzine pružanja usluga, te kroz planiranu dogradnju platnih sistema po preporukama iz Programa procjene finansijskog sektora (FSAP) međunarodnih finansijskih institucija.

## KARTIČNO POSLOVANJE U BIH



Prema podacima Centralne banke Bosne i Hercegovine (CBBiH), na kraju 2016. godine usluge kartičnog poslovanja pružale su 24 komercijalne banke u BiH. Riječ je o globalnim brendovima: MasterCard, Visa i American Express, dok samo tri banke nude jedinu domaću karticu – Bamcard.

Prošle godine, ukupan broj aktivnih kartica bio je 2.042.280, za razliku od 2015. godine kada je bilo 2.013.219 kartica kod građana BiH. To je povećanje od 29.061 kartice u odnosu na 2015. godinu.

Vrijednost transakcija koje su protekle godine realizovane karticama u zemlji i inostranstvu, iznosila je 8.791.381.069 KM, što je povećanje u odnosu na 2015. godinu kada je realizovana vrijednost transakcija bila 7.663.585.465 KM.

Od ukupne vrijednosti transakcija realizovanih upotrebom kartica u zemlji i inostranstvu, u 2016. godini, putem ATM aparata podignuto je gotovine u iznosu od 6.244.340.685 KM ili 71% vrijednosti, a na POS aparatima je realizovano

2.547.040.384 KM ili 29% vrijednosti. U protekloj godini procenat realizovane gotovine na ATM i POS uređajima je iznosio 82%, a vrijednost roba i usluga je iznosila samo 18% od ukupnog prometa putem kartica.

Prosječna vrijednost jedne transakcije bila je 112 KM u 2016. godini i veća je u odnosu na prethodnu godinu za 3 KM. Prosječan godišnji promet po jednoj kartici je u 2016. godini iznosio 4.305 KM, za razliku od 2015. godine kada je bio manji i iznosio je 3.807 KM. Dakle, zabilježeno je povećanje u visini od 498 KM.

U protekloj godini, na ATM i POS uređajima banaka u inostranstvu, građani BiH su, preko kartica izdatih u našoj zemlji, realizovali iznos od 493.665.871 KM, što je za 62.836.827 KM više u odnosu na godinu ranije. Od tog iznosa, na ATM i POS uređajima je podignuto gotovog novca 157.432.300 KM, a robe i usluga na POS uređajima je realizovano u visini od 336.233.572 KM.

Strani građani su karticama svojih banaka iz inostranstva na ATM i POS uređajima bh. banaka u 2016. godini realizovali 1.469.698.415 KM, od čega je preko ATM i POS uređaja dignuto gotovine u iznosu od 1.075.006.118 KM, dok je robe i usluga preko POS uređaja realizovano u visini od 394.692.297 KM.

Banke intenzivno rade na uvođenju u ponudu sve većeg broja ATM i POS uređaja. U protekloj godini bilo je ukupno 1.512 instaliranih ATM uređaja i 27.353 POS uređaja, od toga 26.324 u trgovinama i 1.029 na šalterima banaka.

Sve banke u BiH nude Internet bankarstvo ili neku vrstu elektronskog bankarstva. Podaci pokazuju izražen trend povećanja broja klijenata koji koriste ove usluge. Ovom vrstom usluge obuhvaćeno je ukupno 383.761 subjekat, dok je u 2015. godini bilo ukupno 314.777 subjekata koji su koristili ovu uslugu. Od ukupnog broja korisnika Internet ili neke vrste elektronskog bankarstva, 48.053 je bilo pravnih subjekata i 335.708 fizičkih lica.

INFO  
CBBiH





## PREDSTAVNICI AMERIČKIH FEDERALNIH REZERVI POSJETILI CBBiH



Predstavnici Federalnih rezervi (FED) iz New Yorka posjetili su, 29. 3. 2017. godine, Centralnu banku Bosne i Hercegovine (CBBiH), gdje su s guvernerom CBBiH dr. Senadom Softićem i njegovim saradnicima razgovarali o mogućnosti uspostavljanja korespondentskih odnosa i saradnje ove dvije institucije.

Budući da FED New York, u ime Sistema federalnih rezervi SAD, pruža bankarske i druge usluge drugim svjetskim centralnim bankama, vladama i međunarodnim zvaničnim institucijama (oko 200 subjekata), CBBiH je ovoj instituciji uputila zahtjev za uspostavljanje korespondentskih odnosa i korištenje usluga koje FED New York nudi.

Imajući u vidu činjenicu da CBBiH, u skladu sa Zakonom o CBBiH, radi po aranžmanu valutnog odbora i da je domaća valuta vezana za euro, postoji zakonsko ograničenje iznosa sredstava koja se mogu držati u drugim neeuro valutama. Ipak, CBBiH je zainteresovana da ispita mogućnost investiranja u vrijednosne papire SAD posredstvom FED-a, a o čemu je i razgovarano tokom sastanka.

## DELEGACIJA DG ECFIN U POSJETI CBBiH



Centralnu banku Bosne i Hercegovine (CBBiH), 6. 3. 2017. godine, posjetila je delegacija Generalne direkcije za ekonomska i finansijska pitanja Evropske komisije (DG ECFIN). Delegaciju je predvodila direktorica gđa Elena Flores.

Posjeta delegacije, s kojom je razgovarao guverner CBBiH dr. Senad Softić sa saradnicima, u kontekstu je ocjene programa ekonomskih reformi BiH za period 2017 – 2019., te pripreme prijedloga smjernica u oblasti politika koje će u finalnoj verziji biti usvojene 23. 5. 2017. godine, na sastanku zemalja članica Evropske unije (EU) i zemalja

Zapadnog Balkana. Gđa Flores koristi svoj boravak u BiH i kako bi se informisala o generalnim ekonomskim pitanjima.

CBBiH će, prema guvernerovim riječima, nastaviti s redovnim aktivnostima propisanim Zakonom o CBBiH. Pored redovnih aktivnosti, u ovoj godini planirani su modernizacija i dogradnja žirokliring sistema, Jedinstvenog registra transakcijskih računa i Centralnog registra kredita, što pojačava transparentnost u finansijskom i platnom sistemu, ažurnost podataka, sprečavanje zloupotreba i sprečavanje pranja novca. Ove aktivnosti su u skladu sa standardima i najboljom praksom u zemljama regije i EU, a od višestruke su koristi za sve aktere u finansijskom i ekonomskom sistemu BiH, istakao je guverner Softić.

Delegacija DG ECFIN interesovala se i za ekonomski rast u BiH, za režim valutnog odbora, za pitanja iz oblasti bankarskog sektora, te za prilive stranih direktnih investicija – da li je pad u 2016. godini razlog za zabrinutost i koji su razlozi doveli do ovog pada. Jedna od tema razgovora bila je i statistika koja se odnosi na podatke o inflaciji i na podatke o vladinim finansijama.

## GUVERNER SOFTIĆ RAZGOVARAO S ODBOROM DIREKTORA EBRD-a



Guverner Centralne banke Bosne i Hercegovine (CBBiH), dr. Senad Softić sastao se 28. 3. 2017. godine s Odborom direktora Evropske banke za obnovu i razvoj (EBRD), koji je boravio u trodnevnoj posjeti Sarajevu u sklopu priprema nove EBRD-ove strategije za Bosnu i Hercegovinu za period 2017-2021.

Svrha posjete CBBiH bila je upoznavanje s rizicima i izazovima s kojima se bankarski sektor Bosne i Hercegovine suočava, informisanje o novim zakonskim rješenjima kojima se reguliše bankarski sektor i osiguranje depozita u Bosni i Hercegovini, kao i očekivani uticaj tih rješenja na finansijski sektor. Delegacija EBRD-a je, takođe, iskoristila ovu priliku da se upozna o makroekonomskim pokazateljima za državu s posebnim fokusom na kretanja u finansijskom sektoru.

Tokom razgovora, guverner Softić je istakao zadovoljstvo posjetom Odbora direktora, pri tome naglasivši pozitivnu ulogu EBRD-a kao jednog od najbitnijih institucionalnih investitora u Bosnu i Hercegovinu tokom posljednjih 20 godina, izrazivši pri tome nadanje da će ova banka i dalje ostati aktivna u našoj državi.

Sastanku su, osim predstavnika CBBiH, prisustvovali i predstavnici agencija za bankarstvo Federacije BiH i Republike Srpske i Agencije za osiguranje depozita Bosne i Hercegovine.

## GUVERNER CBBiH RAZGOVARAO S DELEGACIJOM MMF-a



Guverner Centralne banke Bosne i Hercegovine (CBBiH) dr. Senad Softić, sa saradnicima, razgovarao je 7. 3. 2017. godine u Sarajevu s delegacijom Međunarodnog monetarnog fonda (MMF). Delegaciju MMF-a je predvodio šef Misije MMF-a za BiH Nadeem Ilahi.

Tokom sastanka razgovarano je o nastavku praćenja napretka u ispunjavanju uslova i prethodnih mjera za okončanje prvog pregleda po Proširenom aranžmanu između BiH i MMF-a.

Guverner Softić je upoznao predstavnike MMF-a o poduzetim aktivnostima i statusom provedbe mjera iz Pisma namjere koje se odnose na CBBiH, uključujući i pripremu sveobuhvatnog Memoranduma o razumijevanju u oblasti finansijske stabilnosti.



## GUVERNER SOFTIĆ POTPISAO MEĐUBANKARSKI SPORAZUM O ISPLATI KLIRINŠKOG DUGA



Guverner Centralne banke Bosne i Hercegovine (CBBiH) dr. Senad Softić je, 21. 3. 2017. godine u Moskvi, u ime CBBiH, koja je bankarski i fiskalni agent države Bosne i Hercegovine, potpisao međubankarski sporazum s predstavnicima državne Banke za razvoj i vanjske ekonomske odnose (Vnešekonombank) iz Rusije.

Ovim sporazumom se reguliše obračun i otplata duga prema Sporazumu između Vlade Ruske Federacije i Vijeća ministara Bosne i Hercegovine o izmirenju obaveza bivšeg

SSSR-a po obračunima u vezi s robnim prometom između bivšeg SSSR-a i bivše SFRJ.

Potpisivanjem ovog međubankarskog sporazuma stvoreni su tehnički preduслови za isplatu klirinškog duga bivšeg SSSR-a prema Bosni i Hercegovini, a njegovom potpisivanju prethodilo je potpisivanje međudržavnog sporazuma, koji su potpisali zamjenik predsjedavajućeg Vijeća ministara BiH i ministar finansija i trezora BiH Vjekoslav Bevanda i zamjenik ministra finansija Ruske Federacije Sergej Anatoljevič Storčak.

Prema uslovima navedenim u sporazumu, u roku od 45 dana nakon ratifikacije Sporazuma između Ruske Federacije i Vijeća ministara BiH, Vnešekonombank će, po primitku sredstava od Ministarstva finansija Ruske Federacije, isplatiti iznos od 125.157.834,38 USD na račun Ministarstva finansija i trezora BiH kod CBBiH.

Sredstva će se dalje rasporediti za potrebe institucija BiH, entitete i Brčko distrikt u skladu s proporcijama dogovorenim u međudržavnom Sporazumu.

## POČINJE IZRADA PLANA INTEGRITETA CBBiH

U skladu sa Strategijom borbe protiv korupcije Bosne i Hercegovine, koju je donijela Parlamentarna Skupština Bosne i Hercegovine, s ciljem realizacije specifičnih mjera iz Akcijskog plana za provođenje Strategije borbe protiv korupcije, Zakona o Agenciji za prevenciju korupcije i koordinaciju borbe protiv korupcije, Agencija za prevenciju korupcije i koordinaciju borbe protiv korupcije donijela je Smjernice za izradu i provođenje plana integriteta. Shodno ovim smjernicama, javne institucije na svim nivoima vlasti u BiH, dužne su izraditi i usvojiti plan integriteta.

Postupajući u tom pravcu, Centralna banka Bosne i Hercegovine (CBBiH) je donijela relevantne odluke kojim je formiran Stručni tim za izradu plana integriteta CBBiH, a predmetnim odlukama su stručnom timu date konkretne nadležnosti u pogledu izvršenja ovog zadatka. U vezi s tim, CBBiH je usvojila Plan borbe protiv korupcije CBBiH, kao još jedan predušlov za izradu Plana integriteta CBBiH.

U svjetlu datih nadležnosti iz navedenih odluka, ostvaren je kontakt s Agencijom za prevenciju korupcije i koordinaciju borbe protiv korupcije (APIK) u vezi s organizovanjem adekvatne edukacije tokom koje će biti objašnjeno na koji način izraditi plan integriteta za CBBiH. S tim u vezi, 4. 4. 2017. godine, predstavnici APIK-a su održali edukaciju za članove Stručnog tima i rukovodeće službenike u CBBiH.

## ODRŽANA EDUKACIJA SLUŽBENIKA KOJI ĆE RADITI NA IMPLEMENTACIJI ISO STANDARDA KVALITETA

U okviru SPI GIZ programa, Centralna banka Bosne i Hercegovine učestvuje u tematskoj oblasti pod nazivom „Upravljanje sistemom kvaliteta u cilju poboljšanja i uspostave procesno orijentiranog sistema upravljanja kvalitetom“. Sistem će biti implementiran na svim lokacijama CBBiH – u Centralnom uredu Centralne banke u Sarajevu, Glavnoj jedinici Sarajevo, Glavnoj jedinici Mostar, Glavnoj banci Republike Srpske Centralne banke Bosne i Hercegovine Banja Luka, Filijali Centralne banke Bosne i Hercegovine u Brčkom i Filijali Centralne banke Bosne i Hercegovine na Palama.

U sklopu realizacije projekta, početkom aprila organizovana je intenzivna edukacija službenika koji će raditi na implementaciji ISO standarda kvaliteta. Edukacija za predstavnike rukovodstva za kvalitet trajala je osam radnih dana, podijeljenih u dva ciklusa obuke po četiri dana. Obuku je držala konsultantska firma TÜVadria d.o.o. koju je ugovorio GIZ. Obuka nudi sva potrebna znanja za ISO 9001 i pripadajući certifikat.



## UČENICI SREDNJIH ŠKOLA IZ ŠIROKOG BRIJEGA I MAGLAJA I STUDENTI IZ SARAJEVA POSJETILI CBBiH



U posjeti Centralnoj banci Bosne i Hercegovine 31. 3. i 7. 4. 2017. godine boravili su učenici završnih razreda Srednje strukovne škole iz Širokog Brijega i učenici Mješovite srednje škole iz Maglaja. Osim što imaju nastavu i predavanja, profesori ovih škola nastoje učenike, koliko je to moguće, educirati van nastave, organizujući različite sajmove, edukacije, posjete organizacijama i institucijama. U okviru ovakve vrste edukacije, učenici su izrazili želju da posjete CBBiH, gdje im je prezentacije održao prof. dr.

Enver Backović, ekonomski analitičar-ekspert u Uredu vodećeg ekonomiste CBBiH. Učenici su upoznati o kratkoj historiji institucije, osnovnim zadacima, organizacionoj strukturi CBBiH, te o aktivnostima CBBiH na polju saradnje s obrazovnim institucijama. Također, 21. 4. 2017. godine, CBBiH su posjetili studenti Udruženja studenata Pravnog fakulteta u Sarajevu. Svi su bili u prilici obići postavku novca u auli zgrade CBBiH, gdje su im o historiji bh. novca govorili uposleni u Odjeljenju trezora Centralnog ureda CBBiH.

U okviru posjete Bosni i Hercegovini, grupa od 30 studenata Yale School of Management (SOM) posjetila je CBBiH. Riječ je o biznis školi, jako internacionalnog karaktera. Jedan od ciljeva posjete BiH je da studentima budu predstavljene različite perspektive - od političkog vrha, preko domaćih i stranih kompanija, do nevladinih organizacija. Imajući u vidu značaj CBBiH za bosanskohercegovačku ekonomiju, studenti ovog prestižnog američkog univerziteta su iskazali želju da se bolje upoznaju o instituciji i njenom radu o čemu su ih informisali viceguvernerka CBBiH mr. Ernadina Bajrović i prof. dr. Enver Backović, ekonomski analitičar – ekspert u Uredu vodećeg ekonomiste CBBiH. CBBiH je izuzetno zadovoljna zbog činjenice da, osim studenata i učenika sa prostora BiH, i studenti sa univerziteta u inostranstvu pokazuju interesovanje za rad ove institucije.

